

橫  
雲  
山  
人  
集

序

王侍御農山先生高資邃學於古人之業無所  
不精詣至其論詩尤斷斷不啻於唐人力主開寶  
間諸公他瓌瓌弗屑道也令子顓士子武季友三  
君趨庭之暇皆能爲詩季友以詩名其家者早昨  
歲遊成均舟車所經登泰山涉長湖題詠一出入  
競傳寫都人士與海內之能言者無弗知右軍之  
有子矣歸里梓其藁問序於余余謝不敏而不敢  
固以辭也竊聞詩之爲道不必強謀其異亦不必  
堅取其同不務悅人務以信已有所以爲詩者雖

拙弗必掩也無所以爲詩者而取古人之矩矱尺  
寸而規撫之取古人之聲調櫛比而補綴之雖工  
亦奚以爲蓋原取其深不則思以竭而流於僻力  
取其厚不則氣以餒而流於麤夫景物之有鮮萎  
也丰神之有濃淡也體質之有嫺嚴也人工也有  
天致焉况乎寄寓有淺深比興有遠近方其會心  
所至縱筆追之即已亦不自知而以問之悠悠者  
安在風人之旨有耳皆聽而有目皆識乎季友倣  
儻環瑋氣誼敦篤才思橫溢其於詩準之以曩製  
運之以匠心選材精整結構弘深此如苞鳳之振

層霄下高梧一鳴而叶律呂奏歸昌雖有燿燿之羽睨睨之音無足相儷况枋榆之啾啾者哉試以上擬有唐開寶間諸公薄曹劉而凌沈鮑者其供奉耶奪蘇李而掩顏謝者其拾遺耶工密清逸者其王孟耶樸實俊雅者其儲王耶矜貴奇壯而秀美冲淡者其高岑李常耶不期其同而能不異既信諸已而以信諸人所謂有爲而作者不謀而在其中矣不然而如世之製韻言者洋洋授辭自置上座乃擯已謝之華忘陳言之去叔敖更生矣後世采風者其視我爲何代人季友其趨庭而啓前

說知不盡以鄙言爲河漢也康熙庚戌七月既望  
同郡田茂遇鬳淵父題於水西草堂之細論軒

序

自唐以後不復以詩取士士習制舉藝者率以詩爲外篇其父兄之教見子弟或學爲詩輒動色相戒若有甚于僻鷹鬪鷄爲惡少年之行者噫亦太愚且鄙矣古之學者以爲學不當僅取科名而必講求乎聖人君子之道後之學者唯利祿之爲急若稍可旦暮梯榮者則圖諸有一毫無益于詭遇者則禁諸何其視科名之過重而視吾才吾學之太輕也夫遇不遇誠有天焉唯樂天知命者能自審于出處之際而又能以博物稽古勉其後人王

子季友爲吾友王農山侍御季子十五工制舉藝鄉之儒者爭避之二十工爲詩鄉之號爲詩人者又爭避之蓋其上承名父而與賢昆顓士孝廉子武文學一堂相底厲今古並進各擅轡龍之稱烏衣盛事殆再見於今哉農山齒未及艾致政歸居我五茸之南固赤松子所遊處也汲泉蒔藥益復研考賜書不妄有作作必超羣軼倫使吾輩率爾謀篇者望洋而嘆即季友詩學之淵源所從來深矣子亦從內史舊山之側率兒曹帶經而鋤間與南村相唱和雖頗積有成帙每爲瑯琊氏摧鋒殆

盡家學之不振竊自慙焉今季友將挈吾子聯袂而北期觀光上雍吾

與朝文教聿彰名公卿皆能詠歌太平多穆如清風之頌荀陸之對必有從坐談間器吾子者況挾是編也以往又不啻尺璧而寸珠耶予不學之野夫也何足以言詩何足以重子康熙戊申冬月同郡周茂源題於熊巖書舍



序

子友王農山侍御以親老得急請既免喪上書返  
初服於時年始艾也家在黃浦之上將築室而老  
焉黃浦者楚黃歇之封邑居人稱爲春申浦浦之  
南爲赤松溪張子房嘗遊於此其上蓋有赤松子  
祠云農山有子三人皆賢而有才長顓士弱冠登  
賢書次子武聲藉甚諸生間而季友年最少長身  
玉立丰神朗奕工詩善行草人以爲有王子敬之  
風花晨月夕兄弟自爲酬倡農山顧而樂之爲評  
次其高下得失往往夜分乃罷門以內雍雍如也

季友慕司馬相如之爲人以高貲入爲太學上舍  
因得縱觀夫辟雖宮闕羽旄千戚騶虞狸首周旋  
揖讓之盛作爲咏歌聞于輦轂自祭酒以至公卿  
大夫咸折節而敬禮之車馬到門無虛日僉曰農  
山有子矣今年夏余來雲間季友自黃浦挈舟而  
至用父執禮謁余於客館旦日以其詩來再拜而  
請曰願先生有以教之嗟乎父執之禮自東漢已  
不可行而季友乃謙謙卑牧冲然欲復諸古何恭  
且勤若是夫非父兄之教而能然歟逡巡辭讓再  
三不獲請乃告之曰詩自漢魏以迄有唐其物采

亦既備矣其設率亦既章矣譬之於書邯鄲淳之於古文史籀程邈之於大小篆蔡邕毛弘之於八分張伯英之於草書羲獻父子之於行楷莫不自成一家深造於能事之精微後之人或欲易其波磔點畫則人將從而笑之然此數君子者其氣魄已銷亡矣其法雖存其巧不可得而傳也故昔之善學書者至于發冢嘔血廢眠食濡毛髮以求之猝然有得變化乃生陽開陰闔雲興電逝山嶽之崩頽日月之薄蝕舉不足入其胸中而後蛟龍神怪出沒于吾之指端而作者不自知也夫一藝之

成非專精且不能至而況于詩乎今季友之詩既已卓然足傳而於臨池又甚精觸類而進之日新而不知止則二者之長古人未知其孰勝也小宛之卒章曰我日斯邁而月斯征言歲月之易流也吾固願季友之終勗之也書諸冊並以告于其兄農山覽之當听然一笑也康熙庚戌夏五之望東海宋琬撰

序

蓋余束髮遊吳越壯而若齊若魯若燕趙已而南  
歷嵩洛涉豫章馳驅於西晉間所至山川城郭名  
跡偉人誠不乏矣獨於季友王子有不可及焉季  
友農山侍御之季子知其人天下才也五六年  
前遇周釜山坐間終日未嘗出一語絕無少年凌厲  
驕伉之習余異之亡何散去三四年間從友人處  
得見其吟咏益復異之逮己酉北遊上雍挾一冊  
問序於余余盡讀之而知其爲才後北歸時時過  
余言詩相得甚歡也其時宋荔裳觀察及同里諸

名公有社集每共設鷄黍歌呼晨夕諸子飲輒數  
斗季友不勝杯酌而操筆鬪捷多彪舉多與人人  
殊座無勿靡廼其人溫然類長者余愈嘆季友之  
不可及是讀書而善用其才者也夫咏歌之道關  
乎情性情性不至者不能爲必傳之詩余嘗上下  
往昔宋元姑勿論其自漢魏以暨六代初盛唐其  
間忠臣孝子遷人怨婦託物起興用以伸一時之  
感激展千古之悲涼讀之一唱三歎而不厭傳之  
彌久而不可磨滅性情至也今季友之集具在其  
爾皇沈博有物有則周秦彞鼎也其春容雋劭珊

瑚間碧樹也其縱橫闔闢如程不識將兵不令毫  
髮出法度外也其奇姿邁豁又如龍門三峽羊腸  
九折飛走流注之不可端倪也大者嚴以裕而不  
淫細則絲如而縝以栗其道不穎華則勿侈勿弇  
壯則氣之平深則性之厚其于學也至乎哉夫使  
讀而思之者孔碩肆好全乎漢魏初盛唐而能以  
資深自得忠愛悱惻有見于言前而發于言後者  
又未嘗有漢魏初盛唐之跡伯樂之于馬也風胡  
之于劍也倕之車曠之音般之器也豈非神行乎  
其間哉語云衡霍之巖虎豹藏焉瀛渤之區蛟螭

生焉季友上承名父復與昆仲輩鞭弭競奮建北  
地之旂挾信陽之轂亦天相之也吾吳以詩擅名  
者無慮數十家出而相雄長而溫柔敦厚之旨或  
缺是不可與言詩亦烏能必其詩之傳也嗟乎士  
君子不朽大業在上則黼黻廊廟今季友以英妙  
之年橫絕九萬里無難也余老矣神耗才盡毋當  
作者以視季友之所得能不逡巡而自慙乎康熙  
辛亥端陽前三日同里弟吳懋謙字菴氏題于北  
郊之望山閣



序

雲間王子季友余友侍御農山之季子也余昔與侍御及宋中丞林屋吳祭酒梅村曹司農秋岳數君子聚首長安交相善也每暇日經過輒相與汎濶古今或松下長哦或馬上倡和期於追躅古人庶幾建安諸子之勝事未幾而農山以乞養歸諸君子亦皆星流雲散或化去爲異物嗚呼十餘年事耳而升沈之感陵谷變遷之殊回視當年一觴一詠邈然不可再見然後知昔賢之泣岐路非無故也已酉夏季友以應舉入都投余以詩文一卷

余燃燭讀之爲之赧然色喜蓋嘆侍御之家學有  
自而季友以年少駿才爲能不媿其名父也夫關  
中鄴下既以異體河外江南亦復殊骨甘辛丹素  
未有能兼美而並善者矣今季友齒僅若士衡兄  
弟耳乃覽其諸體高言何綺逸思如雲原本風騷  
而一諧於古人之風格雲間代多俊人固當以第  
一流相品目也農山曠世才一試憲府輒拂衣去  
孤標逸興吾黨恒欣慕之聞其長君孝廉顓士次  
君文學子武咸能蒐獵藝林馳騁文囿今見季友  
益信瑯琊三珠樹殆未許濬冲沈默獨擅晉代矣

雖然詩只季友之餘技耳予觀其制舉藝體裁純  
正規準先民卓然有昆湖荆石兩先生遺風異日  
吐葩揚藻蔚爲國華使天下購其一字如寸珠尺  
璧與燕許並駕千載季友豈徒以詩名者哉余喜  
吾友之有令子而益忻然於文章後起之秀於斯  
道爲不孤也康熙己酉秋七月淮南龔鼎孳題

橫雲山人集目錄

第一卷 颺言集

癸丑六月六日

駕幸西苑觀荷 賜近臣

讌恭賦

附 七言律詩八首

南苑賦

昇平詞六十首

第二卷 颺言集

甘霖賦

有序

附

五言排律一首

璿璣玉衡賦

有序 附

五言排律一首

平滇頌

有序

經筵頌

有序

第三卷

颺言集

永清漠北頌

有序

大告成功頌

有序

凱歌四十首

有小引

第四卷

颺言集

南巡治河布德施恩頌

有序

時巡歌四十章

萬壽無疆詩

有序

大駕南巡頌德祝

聖詩二十章

有序

第五卷 颺言集

萬壽頌

有序

己亥六月初七日仰蒙

諭旨賜

臣鴻緒

御書聖製七言律詩金扇一柄

御書五言對聯一副并蜜餞山查一餅蜜餞接梨

一餅乾細鱗魚三尾

隆恩異數寵溢在廷不勝榮感敬和

天韻八首

橫雲山人集卷之一

雲間王鴻緒儼齋撰

颺言集

癸丑六月六日

駕幸西苑觀荷

賜近臣讌恭賦

時維炎節候協薰風瞻嘉林兮綠蔚睇芳卉  
兮繁叢居明堂兮右个中玉律之林鍾維時  
江海不波山澤竝晏馴雉北飛昭華西獻金  
枝秀而朱草榮銀甕登而罷車薦懷德歌兮

蠻陬擊壤吟兮畿甸調五緯於星辰潤八維  
乎風電我

皇乃順和氣娛休期撫嘉月命良時開上苑啓銅  
池張廣筵受天禧先期一日申命百司雍雍  
裔裔濟濟師師聆金鑰而戒旦警銅壺而繞  
墀俄而玉繩西界燭龍東旭丹甍映綺翠華  
騰綈爰有臺閣名卿閥閱望族懿德則高陽  
任城股肱則富平博陸或珥筆而簪貂或含  
雞而畫鹿省署之班惟兩尚書之條有六莫  
不騶飄五就之纓體飾三花之服依紫禁以



趨風仰

天顏而齊肅

天子於是駕金根之車駟白義之駟被袞龍之衣  
垂黃玉之珮命兩師而驅塵麾雲將使揚幟  
雲罕與碧柳爭輝芝蓋共青槐交媚輦則夾  
道畱香旂則中霄聳翠爰自紫宮臻乎西苑  
萬騎隨輪千官迎憶渡玉梁之逶迤陟崇阿  
而游衍敷七寶之華茵敞迎薰之玉殿其爲  
殿也高捫太一近睹瑤光蚪蟠文砌龍蜿蜒  
梁玉櫺星錯繡簷翬翔屏風以琉璃作障壁

帶以黃金爲釭俯而視之則晴波連日紫烟  
曜天迷離玉葉蕩漾素蟾仿太液今在漢如  
昆明今象滇黃鵠之所翔集文鯨之所遊潛  
鳧鷖飛而復下鴛鴦去而來還紛雕胡與菰  
蔣濡甘澤而增妍其上則有嘉樹陰岑芳林  
莽蒼合翠同帷羃綠竝幌鳳桐花而往來鶯  
金衣而上下鳥呼侶而流清蟬吟風而逸響  
夾輦路以飛揚繞屬玉之弘敞蔭直道之修  
延映銀濤之滌浹別有廣榭崇臺飛樓層閣  
縹緲霞興差池雲薄燦爛蔥菁或隱或明煌

乎若崆峒之化城隱映林樾參差突兀煒乎  
如龍伯之珠闕若夫嘉蓮之挺秀實專榮乎  
九夏菡萏歌乎陳風澤芝標于爾雅葩含房  
而吐朱葉偃蓋而被綠朱則蜀岫丹砂綠則  
睢陽琤瑤赫兮晨照之耀澄波爛兮落霞之  
縈寒谷涌奇氛於滄池飄天香於金屋傍御  
柳而傳芬映宮槐而畱馥乍披拂兮明璫又  
迴翔兮霧縠被中使兮荷裳染侍臣兮香玉  
况復千葉環生五色周列百頃丹舒萬穎芳  
澈託

皇居以呈華近彤墀而標節詎華嶽之幽深寧醴  
湖之孤潔我

皇用是撫此柔莖懌彼麗草感冲氣之中函嘉清  
標之孔好懷在鎬慶樂胥玉案列綺席舒爰  
詔臣工式同燕譽尊卑以序先後以臚俎瓊  
膏而玉實觴赤瑛與車渠飯不周之夜明勺  
丙穴之嘉魚監浦鮮禽金盤猶溢梁王大鬻  
玉盃方餘既而  
天澤彌渥上宰宣

綸詠湛露兮無歸命式燕之重申乃復發令榜

師遨遊碧沼

一人御翔鳳之舟羣臣駕飛雲之輿酌羽觴以盤桓侑碧筩以窈窕藻紫楫而橫流花迎艎而含笑瞻景山之差峩挹虹橋之雙耀於斯時也至德殷流太和洋溢榮光鏡河霏烟籠澤恭默以思協符邃古玉輅式旋永凝天祐遨翔禮園容與書府燕笑語兮賦蓼蕭告平成兮覽韶舞自苞九而叅兩遂登三而軼五陋夏啓于鈞臺卑姬宣于原圃豈如唐家宮闕徒吟望春之章漢帝樓臺漫奏柏梁之賦乃

作頌曰

於爍我

后宵衣昧旦八極來王卿雲縵縵紫蓋晨暉黃旗  
宵燦寶鏡世傳珠囊天贊巍巍瀛臺西翊紫  
宮松篁畫裏樓閣鏡中方圓仙島河洛帝風  
波瑩浸月霞蔚飛虹鑾輿臨止禁林燕喜庶  
尹鏘鏘三事濟濟變彼紅蕖函芳中沚含露  
珠圓迎風舞起

宸衷泮奭迺命造舟紫葢陳席甘露盈甌十旬芳  
饌千品奇羞和風翔洽淑氣蒸流皇哉唐哉

君臣一德孰處孰軒是揆是式小臣載筆恭  
承嘉績惟

皇受祉時萬時億

附七言律詩八首

駕幸西苑觀荷

賜近臣讌恭紀

雞人初唱入瀛臺紅嶼羣瞻鳳輦來不盡波  
光搖黼帳無邊山翠落蓬萊柳含仙仗晴烟  
動花泥金莖曉露開最是

九重宵旰切

宸遊暫捧柏梁杯

其二

千章苑樹鬱菁葱  
樹底朝儀拜舞同  
爵引躬  
桓分五等班  
隨劍履列三公  
蒼龍宵過銅池  
雨  
朱鳳朝縈玉岫  
風  
鵠立濃陰  
頻倚望  
傳呼  
珍饌自離宮

其三

芙蕖一片飲龍川  
此日身遊銀漢邊  
繞峴峰  
巒雲外出  
傍流樓殿鏡中懸  
青青田葉迎仙  
珮  
宛宛池香入綺筵  
何幸小臣叨侍從  
媿無



詞藻奏甘泉

其四

從官朴舞拜殊恩，紺幄傳來

帝語溫。自是太和流玉陛，不須天樂奏雲門。尚方  
重整芙蓉宴，中使還添琥珀樽。幸仰宸襟歌在鎬，願將雨露滿乾坤。

其五

迎薰亭敞對蒲荷

帝賞親藩桂棹過。共識唐堯敦族禮，詎同漢武濟汾歌。風來琪樹蟬聲滿，水蕩珠窗燕語多。盛

世明良真一德從容杯酒矢卷阿

其六

已沐

君恩等賜酺却催龍舸泛芳湖薰風徐動牙檣轉  
曉日晴懸水榭孤拜捧樽罍皆玉醴坐來雲  
浪是蓬壺臨流還賡嘉魚詠

聖澤知應水旱無

其七

昆明重泛靄晴暉潭影巖光入紫微  
傍艦魚龍潛復見近人鳬雁浴還飛  
花間風起飄朱

旆波上雲生繞

御衣萬國雄圖同愷樂更看

宸藻倍芳菲

其八

日午舟回漾碧濤  
瑶池讌罷醉葡萄  
橋邊虹落雕欄迴  
樹杪螭盤桂殿高  
羽騎更開喧翠  
旄雲霄長自識黃袍  
深知湛露歡無極  
戴德翻思

聖主勞康熙十二年六月

翰林院編修臣王

鴻緒拜手稽首恭撰上

進

南苑賦

猗燕畿之雄服據九土之奧區直尾箕而畫  
野控渤海以定都侯綏仰之而和會

聖人御焉而膺圖爰有南海鬱鬱國陽帶以灤易  
曄衛之水襟以玉泉翠微之岡繞以薊丘督  
亢之饒沃重以千秋勝國之遺疆其外則銍  
總蒙秭稱三輔之腴土焉聚落碁置列灌絳  
之別墅焉原隰鱗次編羽林之囿圃焉繚以  
長垣搆以崇墉塗以西蜀之丹潤以赤堇之

銅象營室之絕乎天漢似天田之屬乎紫宮  
遠而望之燦乎如初升之璧月爛兮如春霽  
之修虹其內則廣臯狹畦直塗曲畛千頃鱗  
鱗羣動蠢蠢鬱嘉木之披離挺喬柯之輪囷  
栽修阜之逶迤歷窪谷之蔽隱儼重局之軒  
豁羅奇珍而淵蘊其水則陂高粱之流液涵  
素波而瀕洞待太液之遊鵠婉樂池之集鳳  
浪雲浮錦波霞浸竦冰泉凝沍玉濤迴動中  
則紫莖綠穉碧蒲翠萍澤芝玉蕊雞頭紫莖  
田田似蓋齒齒若鯨文魚媵婢珠蛤含星上

則鳬鷺春舞鴛鴦晴宿虞蓼披紅芙蓉垂綠  
其樹則有長生交讓連理合歡靈松菌桂神  
梓木蘭絳桃素柰青檉紫檀夏侯之所賦嵇  
含之所歎漢帝之所移植魏王之所遊觀莫  
不菁蔥鱗耀膠結糾蟠其草則有杜若卷施  
縹蘭紫蕙慎火離離迷迭穉穉或潤露而朝  
陽或迎風而藉地其鳥獸則有蒼鶴千歲文  
翬五色鳩鵲嗟乎靈沼孔雀貢于南域濯濯  
白銀之麇龐然黃金之鹿鷹隼之所摧搏獫  
狁之所騰逐珍禽奇獸或充牣而擾畜山虞

不能錄其名獸人不能殫其族於是層樓蔚  
起柘館參差龍櫬耀日鳳桷侵霓周廬交列  
帷幕密施宮則師得儲胥之制殿則九成興  
慶之規凌瑤光而捫太一橫赤道而掩黃旗  
蓋

六龍巡幸之暇而爰居爰處者實在乎斯若夫  
景暄妍兮有曜風習習兮自南鳥睨睨兮和  
轉林陰鬱而氤氲覲芳辰其韶淑景河洛之  
美談寫

宸情兮懌豫命龍駕而戒鸞驂爾乃建翡翠之旌

鳴靈鼉之鼓繕招搖而指河魁面朱雀而背  
元武容容與與千乘萬騎而戾乎其所以乃

命八校之長七萃之士騁渠黃騰駮耳張越棘釋  
盧矢繳素鵬弋白雉一發兼縱三驅殪兕覈  
命中之上下而課其能否既而室弓服羽軍  
事攸畢神武喬皇山海寧一羣臣於是踴蹕  
濟濟而上萬年之觴陳軀劉之禮歌吉日之  
章召司馬于上林命子雲于長楊廣武功以  
文德易肅殺而惠以吉康蓋其冬狩夏苗以  
儆軍實而非以遊翺也春巡秋省以物土宜



而非以驅騁也陰殺陽生以若時紀而非以  
軼情也獻賦歌詩以賁太平而非以教嬉也  
猗歟皇哉竝西陲之靈臺駕東京之甫草陋  
漢后之遊汾樂姬宗之在鎬故能使七澤遜  
其勝九藪讓其奇華林芳樂媿其德楚賔齊  
客失其詞惟鴻恩之翔洽畀萬族以熙熙爰  
合符於軒處遂垂拱而治之

昇平詞六十首

皇帝御極十有六載大化殷流仁風翔洽萌生之  
倫罔不吉康乃猶欽翼小心聿修厥德誕敷

文命勤恤民隱凡皇古未覩之事歲幾於史  
牒者固已不可殫述矣邇者大武布昭小醜  
歸命

王猷允塞四方底定猗歟休哉昔姬道昌明天  
保作歌商宗撻伐殷武志頌威以揚於盛事  
昭示來茲今幸逢

至治之朝得覩貞元之會安可不詠歌休美絜  
三代而同風謹原本南雅麟趾魚藻之遺希  
樂府昇平太和之體制則疊賡首句韻則叶  
奏連章但媿

臣鴻緒

末學謏陋珥筆無文不

足以仰鋪

聖德萬分之一爾爰拜手稽首以

獻曰我

皇景福致昇平六宇祥光滿太清寶籙久膺龍馬  
瑞卿雲常繞鳳凰城

我

皇第祿致昇平山嶽猶呼萬歲聲日射金臺成帝  
室雲連遼海作陪京

我

皇格帝致昇平方澤園丘祀典明蒼壁黃琮親灌

獻九霄甘露拂霓旌

我

皇祈穀致昇平春孟天田曙色清威羽金絲歌黍稷萬方霖雨蒼蒼生

我

皇禋祀致昇平壇坎春秋宿霧清五緯貫珠開鳳曆中天聯璧映璣衡

我

皇旅望致昇平震疊懷柔海嶽清玉女不勞方丈去瑤函嘗見白雲生

我

皇念祖致昇平漏永深宮對越誠

三后在天嘗陟降萬年世德配神京

我

皇報本致昇平霜露零時愼優聲四序薦新蕭燭

合

奉先齋殿玉蕭生

我

皇繩武致昇平關石和鈞典則明四海盡歌新雨

露

九重仍法舊章程

我

皇尊養致昇平問寢

慈闈曉日迎屢上徽音鏤寶冊輝煌彤管妙任名

我

皇追遠致昇平躬謁園陵鳳輦行累代天球瑤

殿列五雲松柏玉衣明

我

皇神智致昇平睿照山河萬里明長似乾坤懸日

月玉霄雲淨見澄清

我

皇聖德致昇平雲日羣歌遍八紘已是  
宸修能邁古更思保泰在持盈

我

皇仁育致昇平沛澤如春草木榮應見騶虞游苑  
囿載聽仙樂譜由庚

我

皇義問致昇平紫闥遙通蔀屋情

綸綍每宣霄漢上萬方歡動似雷聲

我

皇敦禮致昇平蒞政班朝百職明綿蕞不須陳漢  
室秩宗宣命在寅清

我

皇彰信致昇平孚及豚魚得一貞自是推心能置  
腹盡降銅馬慶休兵

我

皇作樂致昇平兩序鏗鏘奏九成千羽却同羣獸  
舞簫韶似雜鳳凰鳴

我

皇克儉致昇平主一深宮志氣清不是露臺偏惜



費祗因杼柚念民生

我

皇友愛致昇平金冊鏤成帶礪盟每遇良辰同讌  
賞春風花萼不勝情

我

皇敷教致昇平木鐸巡行黨序明孔壁詩書懸僻  
壤田家絃誦雜春耕

我

皇懋學致昇平丙夜猶傳御邇英自是圖書消漏  
永不知天際玉繩橫

我

皇重道致昇平洙泗千秋絕學明日昃退朝金殿  
暇圖懸太極溯周程

我

皇勤政致昇平軍國焦勞 睿慮縈椒禁漏沉頻  
問夜未央前殿月猶明

我

皇欽若致昇平分命羲和象緯清氣候黃鐘知曆  
暖時占蓂莢傍階生

我

星納諫致昇平金闕高懸進善旌最是

聖神能止輦梧桐朝日鳳長鳴

我

皇麗藻致昇平銀漢天章玉軸明不數唐宗誇翰  
墨賜來詞苑重瓊瑛

我

皇博綜致昇平二酉藏書燭照明學海波瀾天廣  
大蠹魚殘簡陋儒生

我

皇賡載致昇平日月光華爛熳明仙韻九天飄玉

屑薰風吹入舜絃鳴

我

皇一德致昇平樂愷真同魚水情上下泰交調玉  
燭時聞深殿拜颺聲

我

皇籲俊致昇平束帛丘園若渴情已許蒲輪徵逸  
士更看虎觀集羣英

我

皇視學致昇平北面談經重老更豈鼓書聽仙珮  
集鸞旂春映雜花明

我

皇躬藉致昇平粒食蒸民千畝耕黛耜花間分羽  
仗青牛鞭處列公卿

我

皇大閱致昇平翠蓋龍旗耀日明四海聲靈瞻赫  
輅騰驤百萬羽林兵

我

皇巡幸致昇平零雨郊圻象輦行清問窮簷知物  
阜陳詩列國見民情

我

村雲山人集卷之二  
皇課吏致昇平遍野仁風九穗生自是

丹宸求莫切璽書嘗賜潁川名

我

皇無逸致昇平圖得豳風稼穡情秋雨茅簷聽蟋

蟀春風桑陌見倉鷗

我

皇欽恤致昇平簡命庭堅作士明盛世園扉生茂

草訟冤無復漢緹縈

我

皇肆赦致昇平

丹詔春溫木鳳明浩蕩

王仁能使過雍熙化日慶重生

我

皇旣卜致昇平首列三公衮職明論道九華開玉  
殿親持寶鼎問和羹

我

皇薄歛致昇平惟正條頒九賦輕耕鑿萬年心帝  
力康衢野老遍歌聲

我

皇大武致昇平薄海威揚捷伐聲共仰

王猷真允塞南人歸命息佳兵

我

皇廟算致昇平甲帳談兵虎豹驚指授自精黃石  
法始知將將在神明

我

皇推轂致昇平壁壘天開細柳營競看三台還秉  
鉞秦關蕭相作長城

我

皇戡亂致昇平

特簡親藩百萬兵所向天戈真莫敵會看飲馬倒



昆明

我

皇受欵致昇平叛帥壺漿解甲迎

聖德如天矜不殺芙蓉山下築降城

我

皇靖寇致昇平鑊鼓全收百越城自此盧循難續

命海天烟霧翦長鯨

我

皇懋賞致昇平太府旂常藻采明每念南征諸將

切豫開麟閣勒勲名

我

皇柔遠致昇平王會圖分萬國程航海梯山歸正  
朔越裳來頌

聖人生

我

皇燕樂致昇平眺望河山飲鎬京有道萬年浮玉  
竿

御筵花下賜金莖

我

皇旌直致昇平

丹陛雲深屈軼生吁咈虞廷皆稷契凝旒咸頌

四聰明

我

皇詒穀致昇平懋建

元良萬國貞曉闢銅龍瞻日表重光交映紫宸  
明

我

皇朝會致昇平闔闔雲凝雉尾輕

玉陛鳴鞭齊拜舞九天吹落管絃聲

我

皇諭教致昇平早設宮僚鶴禁清輔導更欣崇聖  
學五經繙譯命桓榮

我

皇壽愷致昇平紫閣天香寶篆輕鸞鳳曉隨金母  
下圖開五嶽映雲輶

我

皇恭己致昇平于羽陳階

帝治成共道陽和鷹眼化從來偃武在文明

我

皇基命致昇平萬紀乾坤正玉衡每勵小心通碧

漢長將大澤瀉滄瀛

我

皇恩賑致昇平發帑開倉幾度行寧使大庖裁玉  
膳不教閭左泣藜羹

我

皇考績致昇平三載羣欽黜陟明大法小廉承泰  
道冰壺爭似百工清

我

皇廣運致昇平浴日流沙滿頌聲自媿小臣才易  
竭巍巍至德信難名康熙十六年 月

日講官起居注左春坊左贊善兼翰林院檢討

臣王鴻緒拜手稽首恭撰上

進

橫雲山人集卷之一

橫雲山人集卷之二

雲間王鴻緒儼齋撰

颺言集

甘霖賦

有序

康熙十有八載歲在己未自春徂夏浹旬不  
雨皇畿以內麥穗失榮禾種未播吾儕小人  
如熏如擣

天子睠念民依省躬下

詔錄寬釐職減膳撤懸齋宮三日

親禱

卷之二  
園丘甘澤立霈優渥露足

聖心悅豫羣工抃舞里井毗庶謳吟成雷年和物  
阜可跂而致撫事抒懷聊爲短賦其詞曰

欽我

后之至德兮普仁膏於區夏協五氣之淳和兮體  
二儀之元化蹤勲華而齊鑣兮配禹湯而方  
駕是以鳳鳥吟岡龍圖獻洛仙芝浥露而瓊  
英曆草含雲而金萼五風十雨之祥彌綸宇  
宙兩岐九穗之徵縱橫畝壑固已良耜騰拵  
拵之歌大田嘯祁祁之樂者非一日矣爾乃



律中仲呂候易條風其帝炎帝其神祝融龍  
星宵朗鶉火昏中蛙部宣音於青渚葦簾萎  
秀於芳叢屆麥秋之淑景命錢鏐於臣工仰  
時雨兮天畢潤嘉種兮芄芃維時金烏爍石  
赤松戢轡少女停驂屏翳離次廣厦鬱以歆  
蒸舜華剪而顛頽姬后嗟乎星嘒衛詩嘆其  
日出誚斬山乎鄭臣諫祀河於齊記奚元陽  
之赫威曷沾溉夫庶類於是史稱大雩禮命  
司巫發玉府之珪璧撤樂正之笙竽神農率  
舞之術繁露閉陽之圖驅肥蠶兮萬里招黑

蜺兮天衢何商羊之匿舞瞻石燕而踟躕  
天子廼下明詔軫冤囚誠百工之未飭憫兆庶之  
何尤齋宮內省惟歲是憂鹵簿不設馳道不  
修肅肅穆穆臻乎

園丘設天宗之瑶席陳殷薦之瓊羞捧蒼璧而昭  
事藉白茅而闡幽灌獻未終淑氣旁流天人  
立應瑞靄蒸浮陽菴夢而弗興陰鬱怫而忽  
作飛廉刁調以吹籟雲將窈窕以迴薄虹天  
矯兮西墜嶽靈翳於廣莫玉女披兮徘徊蒼  
龍翔兮揮霍時則有淪婁婁興雨祁祁始瞻

霖霖之狀繼慶滂沱之施甫歛塵而解塊旋  
潤壤而濡泥滴瀝乎從官之珮淋漓乎扈蹕  
之旗於是旋步輦返丹墀淙淙浼浼霏霏瀾  
瀾蛟珠滴兮繡桷穀文涌兮銅池鳳薨龍闕  
兮飛天台之素瀑千門萬戶兮碎西土之琉  
璃更若非烟非雲如絲如霰聽角武昌看山  
郊縣峴蓋晨張荆石夕絢增易水之潺流加  
灤河之飛濺滋金井之澄清益玉波之縈轉  
覺景象之融和儼芳菲其若泣夫其三推九  
推之藉一易再易之田月令黍稷之紀魯侯

植穉之篇東極之粟善矣涼州之麥名焉外  
羅趙冀內畫幽燕雲子紅苳赤穰青羊連疆  
翼翼竟野綿綿沾濯枝而增秀漲桃花而愈  
妍已津莖而潤葉灌九陌與七阡俾火耕而  
水耨胥起舞而適然使非

天心之默佑感

君禱之維虔安能傾甘霖于俄頃沛汪濊於神川  
雲漢未足以比頌桑林奚得而同傳別若新  
花倍頰長楊添綠碧蒲拂翠素杏拭玉卉萋  
止而莽莽林蒙茸而郁郁萍荷沈復浮鳬鷺

飛又宿隴上佳啼鶯桑間停布穀庾信賦之  
而踟躕陸機詠焉而躑躅要皆乾德之所蘊  
崇而仁膏之所亭毒昔者鄉名穀熟邑號嘉  
禾卿雲作頌甘露升歌湧醴泉于陵陸挺朱  
草于巖阿或呈祥兮拜洛或叶瑞兮遊河雖  
昌期之來告詎景福之孔多豈若曰肅時雨  
粒我烝民墳壚每每原隰昀昀土膏克潤嘉  
穀聿新萬井兮舉趾千耦兮同心編爲大有  
之吉兆我多黍之吟三十年之國用已制三  
十里之畛隰相尋洵乎苞輿蓋以合德統紘

極而施霖越姬文之濯甲超妙服之兩金何  
但芳苑飄花南山蒸霧江南奏浴蘭之什洛  
下獻霑裳之賦而已哉

附五言排律一首

己未四月十五日

上步禱

天壇甘霖立霈恭紀

農務崇初夏驕陽啓

聖憂

九重思稼穡萬井亟鋤耰力作嗟何瘁恒賜詎

有由洗心申庶職

省已祀

園丘肅穆天門迴霏微日影收

乾衷原上格解澤頓翦流工祝詞猶朗爐香氣正  
浮珠翻旋灑幄絲散已霑旒至德躬無闕蒼  
穹望必酬自看湘燕舞奚待土龍求急溜飄  
仙閣奔泉漲御溝沈沈連翠嶺漠漠足芳疇  
六宇雲光溼千林樹色幽崇朝聲不絕抵暮  
勢還稠麥穗垂方結禾苗茁更抽田家應共  
樂歲事可占秋野佇求箱詠途喧喜雨謳宣

祈寧足數湯禱未堪儔

睿感孚璇極

皇仁暘海陬從今消旱魃億載慶時休康熙十八  
年四月  
日講官起居注左春坊左贊善  
兼翰林院檢討  
王鴻緒拜手稽首恭摺上  
進

璿璣玉衡賦

有序

臣聞體乾行道古隆欽若之文治曆調元代  
重授時之典蓋帝王之大法首在敬天而推  
驗之精思惟先尚象粵稽歲起攝提之辟始



建干支運膺炎火之皇爰分晝夜鴻蒙乍開  
規制難詳河圖瑞啓庖羲闡日月星辰之秘  
神策祥開軒帝窮紀元章蒞之占迨璣衡肇  
造於伊祁曆象重研於媯汭驗兩儀之常莫  
有似雞丸考五緯之周行真同蟻磨天包地  
外識金烏旋轉之方地隱天中辨珠斗低昂  
之準六氣調而四時若陰陽適協於圓機九  
霄朗而八極明盈縮全窺於橫管瞻星文於  
午夜瓊光搖碧落之墟候日景于靈臺琳彩  
煥朝陽之色蓋璣惟璿飾而七曜始明衡以

玉雕而三光乃麗信義和之法寶永與球璧  
交珍寶甘石之良規宜若圖疇世守旣而運  
窮秦火代失虞儀蓋天之說誰傳宣夜之書  
無考陰陽一術同金粟之空談生尅諸家等  
玉卮之無當迄乎漢武洛下始紹其模遞及  
元嘉錢樂尚遵其制然精核首推平子詳明  
允數淳風內規外規漏水應星中而合節天  
經天脊游環驗極度而潛符總璣衡之遺意  
猶存皆銅渾之相傳不失恭惟

皇帝陛下乾坤叶德日月同光璧合珠聯史識太

平之有象輪重奎聚書徵帝德之無愆固已  
昭事維虔冥漠契璇宮之志聿懷多福清明  
徹玉宇之誠乃猶以奉若弘功道莫隆於考  
曆勤民成務政首貴乎明時爰

命保章特崇敬授雖聖明作述立法不同而夙夜  
凝承事天則一繼禎符于莆阪治仰光華協  
景慶於薰絃人遊沕穆雕題鑿齒共懷松棟  
之風烏弋黃皮齊奉奠階之朔信御六而參  
兩邁五而登三者矣於時元鳥司辰青旂轉  
候公車待詔霞蒸金馬之門丹陛含毫日麗

銅龍之閣來賦題于天上抽詞藻于人間臣  
濫點清班欣逢盛事敬呈蕪製曷頌

皇猷敢拜手稽首而賦曰

維天運之無垠仰蒼蒼於終古秉剛健以立  
德普覆幬乎六宇殫智慮而難窺藉法天之  
聖主粵稽軒轅受命披圖作觀大橈占斗網隸  
首立算數容成作蓋天史蔭推莢莠羗星官  
之羅列順四時而步天武傳自陶唐彤車白  
馬爰造璣衡分經準舍欽若勿違授時圖夏  
揖讓有虞祇承玉曆仰觀俯察朝乾夕惕碧

漢高低星辰的皦目營心維斯程是適爾其  
爲璣也如輪如轂象天之圓續紛合沓碁布  
星躔煌煌煜煜璀璨編連擘夜光之徑寸綴  
瓊宇之澄鮮爾其爲衡也取質荆山是琢是  
彫中空外堅美儷瓊瑤似截琅玕之竹如橫  
鳳閣之簫用以斜窺夫列宿睨視乎層霄至  
南極北極作天樞紐出地入地或昂或否衆  
星分羅如臣拱后天穹窿而旋左日月五星  
錯落而旋右總度數之勢如皆於是焉觀其  
休咎若夫曜靈東浴玉兔西生拂扶桑而沈

細柳揚素娥而瀉銀瀛一則半贏半縮一則半虧半盈時而重光重潤時而或犯或凌苟按器以潛思洵燭照而有徵迺熒惑處南重華居東太白西而辰星北鎮爲土德宅乎其  
中旣稟性之各異亦徐疾之不同月陰精而具陽日陽精而秉陰金水受光於火日水土  
資生於水金他若羣星之隱見盈萬羅寥廓而森森無不挈靈機而知數倚玉管而探尋  
於考中星實辨昏曉秋虛冬昴夏火春鳥譬  
循環之無端猶翔龍之旋繞定四序於代更

割陰陽於忽秒至稽行道之黃赤分內陰與  
外陽蟾魄之青朱黑白義馭之冬短夏長一  
南而百物凋朽一北而萬彙輝煌等瑤梭之  
交織僚七襄而成章皆璣衡之妙用察天道  
於微茫何三代永守以爲寶遭函關一炬而  
銷亡迨經營始於洛下鑄象肇于壽昌錢樂  
造爲銅渾猗尺度而寸量更若儀名六合制  
起三辰側立斜倚分其位黃環白環運其輪  
儼四遊之在內準直距而維均恃衡管之俯  
仰占晷刻于冬春泊仰儀簡儀之迭變候極

立運之紛綸師古帝之遺法曠千載而同論  
苟厥德其不回何妨乎創制之維新我

皇上文武聖神誕膺景命體天行而作則順民時  
而立政合二氣以相宣調萬年之金鏡念乾  
符下孚於

君德必

皇衷上契乎穆清故前民而開務謹時憲於元正  
離光騰而物照冰輪現而景澄則

宸躬之日月常升恒也視爲木而主明貌爲水而  
主恭聽爲金而主聰思爲土而主睿言爲火



而主從則

君心之五行恒肅雍也無形之七政運行罔息在  
中之璣衡不聞亦式雖上極夫皇王之盛治  
疇得以絜崔巍之至德將使日月循緯五星  
同色比重華之遊河入昴同放勳之覩景出  
翼相與游乎卿雲之縵縵暘九垓而彌萬國  
附五言排律一首

省耕

帝道崇東作王人詠大田劭農原政本粒食  
是民天萬井敷榮始三春力穡先我

皇宵命駕旬帥曉巡阡高下青旗影飄揚翠蓋烟  
茅茨扶杖待丘隴屬車闐野曠驂驪緩村晴  
帳殿懸麥苗光靄靄莒葉色芊芊布穀啼濃  
杏平畦灌碧泉紺轅零雨後黛耜落花前共  
飭耕維耦應期歲取千循途咨疾苦蒸土慰  
旬宣雁羽知方集鳩形絕可憐播時躬率稼  
賑乏賦頻蠲遐邇歌堯壤縱橫濬禹川膏腴  
同藉畝羽騎適于畋戶曉心臧訓風淳駿發  
篇吹銅開黍谷穫稻待函絃遊豫羣生洽謳  
吟四國傳欣看

臨幸地省補自年年康熙十八年五月

日

講官起居注左春坊左贊善兼翰林院檢討

臣王鴻緒拜手稽首恭撰上

進

平滇頌

有序

臣聞開創茂武功繼體崇文德是以戎衣遏  
亂官禮未遑負展而朝甲車以衅漢高除秦  
而制度草昧文帝恭己而威略闕如降自唐  
宋非無偉烈慚德滋多罔克作極若乃膺守  
成之洪運軼開創之隆規聲靈赫濯政治煒

煌躋唐虞而無讓德  
絜湯武而無讓功  
非我聖皇疇臻斯盛  
洪惟

大清誕受寶命

太祖高皇帝開天首出  
闕基丕造

太宗文皇帝繼天作則  
疆宇式廓

世祖章皇帝遏劉鏹暴  
混一區夏天覆地載咸登

版圖爾乃推誠布公  
建屏南徼斯豈

國家兵威未極遐邇而  
資豺虎爲藩翰哉  
洪荒

始闢道登大畜也  
牧寧肆靖實詒

嗣聖仰惟

皇帝續紹曆服昭事

郊廟馨香告虔敬之盡也祇載

兩宮朝夕寢膳孝之篤也肆膏卹灾空山窮蔀咸  
遂生養仁之溥也建官莅事明試而黜陟義  
之至也

講筵日御緝熙光明納典吐謨芟除異學聖之  
極也庶獄庶言庶慎毫髮未協

聖心所照洞若觀火明之遠也

天章昭回璀璨河漢遠駕虞歌近卑姬雅文之煥  
也智慮淵塞不絀不競與天爲謀德之邃也

是用懿化翔洽鴻恩駿龐海宇喁喁同風一  
道梯山航海之使日萃於闕連穎三脊之禎  
日產於郊騶虞白澤比翼九苞之瑞日貢於  
圃夫寧有鴟鴞弗懷而鷹鸇弗化者獨彼滇  
逆包藏禍心久矣隴髀旣衆斧斤不施積成  
尾大

皇帝特欲以恩始終之故蓄而未發廼叛惡陽請  
乞骸潛圖不軌擅鑄山煮海之貨阻篁箐谿  
谷之嶮悖負恩澤反易天常桂海閩越相煽  
同逆內外臣庶恐恐業業

皇帝曰小醜逆命是惟

上帝大殄絕之予曷敢不張厥武爰推轂授律命  
鷹揚之帥簡貔虎之臣嘽嘽赫赫如霆如雷  
西指秦隴則叛將席藁南掃百粵則僞渠駢  
首東定歐冶則逆魁繫頸於是賊桂妖焰沮  
熄狡窟震蕩雖血未斃鼓而兇命先殪乃逆  
孽世璠等猶憑恃險阻苟延喘息益聚蛇豕  
盤糾複穴自謂洞庭溱澗閭巉巖蟻附而  
守可無恐也於是

皇帝默定神算密授閩外飭厲元戎百萬競奮趨

陰平招閬中截錦江川東西底定克辰沅闢  
鎮遠下金筑黔土以寧循梧桂而西輯三江  
之桀驚者至於牂牁西粵率敘凡厥賊黨如  
獸驚魚駭晝夜奔迸乞活不暇

皇帝遂申命禁旅總行營各軍分道竝進或剴其  
前或剴其後或蹙其左或鏖其右風馳電擊  
不可沮禦逆播勢窮力詘猶思一奮螳臂而  
燄火所燎鴻毛灰滅戰無不克軍靡頓刃直  
逼昆池築長圍掘重塹決水以遏奔軼旌旗  
雲合飛走路斷如是者累數月



皇帝遙策賊勢已困嚴勅將士進薄城下賊黨無  
所逃命爭先納款遂函逆璫之首磔叛人之  
黨盡降其僞文武將吏百姓安堵如故於戲  
滇南拒命數年矣遊魂釜底何難盡殺母赦  
皇帝仁育如天俾保首領重覩皞日是役也將帥  
效力士卒用命而進止緩急一稟

宸算故能摧殄逋寇肅靖封疆神且武如是捷奏  
皇帝又穆然深念謂自羣逆煽亂以來將士苦征  
伐百姓疲輸輓尚其弘錫祉福嘉與更始於  
是渙發

綸綍膏澍大沛普天率土旣霑旣渥自茲以往制  
禮作樂報享

皇天告成

祖廟

聖子神孫永祚磐石天下萬世無不仰頌

聖天子武功文德以守成而兼開創皇哉唐哉邁  
百王而燦萬古也臣忝厠侍從弇鄙無文幸  
遇

興朝願效謳頌謹拜手稽首而獻曰

皇清受命臣畜八荒刑以威叛賞以遂良於燦

三聖體元作則汜澤鰲首同謠帝力穆穆我

后至德昭融仁漸義正萬國來同咨爾逆桂誕敢  
亂紀蘊毒崇姦薦爲蛇豕昔滇始平俾膺茅  
胙待以至誠豈期負固亡國之隸言被袞章  
弗圖懷德廼瘳而狂閩粵蜀隴同惡叫譴罔  
兩百族憑險結蟠

天子曰咨瘳我下土爰命虎臣砥厥鉞斧隴山旣  
平桂林旣清番禺旣綏晉安旣寧

帝威孔張逆命日蹙雖漏顯誅神告大戮枯枿之  
肄尚萌其芽逞爾螳臂元我虎牙

天子曰咨無俾易種子造天役式昭駿勇湯湯沅  
湘楫之烝徒匪游匪紹鯨鯢畢逋業業劒閣  
縣車束馬匪安匪舒莫彼梁野仡仡西粵峻  
嶺叢篁化其猩狒服我井疆幽幽貴陽石穴  
一線踏厥窮奇黎苗革面螺商之麓言建我  
旗昆明之蒲言飼我駒

天子曰咨勿稽天罰雉翳鼠伏何莽何窟鷹揚恭  
命鐵駟竝驤合圍十帀箕舒翼張羣孽惴惴  
啜其相泣爰刈厥渠倒戈而繫

天子曰咨矜此憚人我武若霆我仁如春飢者哺

之勞者憩之九賦貞之五過賞之豈惟滇土  
百蠻其康食我嘉德近我休光惟

帝濬哲燭幽鏡逖決策深宮要荒若覲惟  
帝威武靜地動天秉鉞一怒王路平平惟

帝惠澤雲行雨施賞及牛馬品物榮滋惟

帝經綸逾軒邁處制作允釐德音何郁赫赫廣運  
烈烈豐功曰謨曰弼斷自

皇衷庶績孔昭九域孔安邦家其鞏鼎祚其磐登  
封告虔

天祖歆格山川百神莫不悅懌既滌腥穢大正紘

挺

文子文孫於萬斯年小臣作頌難臚

帝德浩浩巍巍與天無極康熙二十年十二月

日講官起居注翰林院侍講加侍讀學士

臣王鴻緒拜手稽首恭撰上

進

附錄

經筵頌

有序

臣聞大寶曰位聖人所以御天明德維馨至治在乎稽古粵自繩書雲扇之年鮮食卉衣

禾皆盈畝詎止唐叔之封麥盡兩岐豈緊張  
堪之績鉤盾桑麻戒青龍而飛蓋羽林劒戟  
視白露而揚旌固已軼周邁夏流唐漂虞者  
矣然而恭默長思靜穆以御懷紹衣之懿辟  
蹤咨號之前徽爲而不宰普鴻化於無言動  
則有成歛神功而典學往者弧矢方威鐘鼓  
尚輟未央待漏猶遲轅固之談承明曳履未  
釋伏生之義眷言啓沃之勲允藉緝熙之學  
羅五采而爲章纔名穀錦集八音而按律始  
叶黃鍾採夜光於合浦亦掇珠璣購拱璧乎

于闐寧遺結綠思鑑形而引鏡振古如茲度  
省括以持弓非聖無法爰稽茂典肅舉經筵  
蓋累朝之法物一代之典章實由茲肇焉於  
斯時也景風遙扇淑氣翊蒸榮光入漢而霏  
微神煙翔空而熠燿露凝御柳低垂龍尾之  
坡霧靄宮槐搖曳螭頭之陸鶯則公子爲名  
燕則天女作號金衣拂樹依稀仙客之笙翠  
羽儀庭彷彿湘靈之佩爾乃玉繩斜界長庚  
西掩金波沈彩于濛汜鬱儀耀景于扶桑聽  
長樂之疎鐘雞傳金響停端門之緩箭龍吐



珠光周廬徹而交戟陳司烜燿而天仗列樞  
精越產高排林邑之珍飛兔蒼龍遠勝華陽  
之種墀填文石舞素虬于銀濤牆罍黃金繚  
赤霞于丹燼

九重芝蓋迎闔闔而輦軒十丈霓旌拂綠翹而隼  
舉言瞻中和邈焉天漢丹楹與絳虹爭輝飛  
薨暨翔鸞並竦法氏象元王氣常存刻玉鋪  
銀皇居自壯

天子於是冕繁露服火龍佩玉具帶朱韞乘六氣  
臨五位而涖止焉時則簾開玳瑁屏展璫璃

張鸞章之幔星錯隨光坐珊瑚之牀霞明蜀  
錦發五明之麗製扇皆丹鵲散十旬之香氣  
爐盡麒麟青蒲近而瑞靄浮武帳褰而

天顏喜乃有濟濟臣工鏘鏘卿尹千乘東平盡是  
偃龍之族長寧齊國咸稱神鯉之姻四姓小  
侯五陵右族丞相御史經術弘寬僕射尚書  
清忠羣珪揚雲高閣千賦猶賒平子宏詞兩  
都旣草羽林名將胥頰奐之雄材宿衛親臣  
盡酈周之舊望莫不鵠立青松鳬趨朱闥不  
違咫尺親依日月之光式凜威嚴身接雲雷

之澤於焉案陳青玉几艷梅檀龍伸螭屈銀  
鈎燦爛之書河北膠東玉版晶瑩之紙登伊  
雒之宿儒晉陽禹之舊德經傳有六直闡危  
微儒分爲七還期精一却流泗水魯堂之琴  
瑟依然高峙鳬山東國之絃歌猶邇平陽安  
邑臯俞禹拜之初景毫岐山湯鉞武旄之盛  
七十二君之封禪儼觀云亭二十一史之污  
隆粲如星日斯誠重華濬哲蔚然日出之光  
溥海和雍同洽雲行之化金支翠旄長獻三  
雍之曲黃琮白琥永升五帝之歆矣臣蓬茅

下士弁陋無文孟堅明堂之篇虛懷弄墨孝  
穆辟雍之頌猶媿揮毫身遊鳳沼漫說梧桐  
班列蛾眉方同榛棘分嘗仙液捧金莖而生  
感叨賜喻縻懷靈簡而仍慙欣逢不世之隆  
儀樂頌昇朝之嘉德敢抒微藻恭紀昌期乃  
作頌曰

皇清受命上帝式眷於皇

太祖奄征赤縣神劒龍爭雷鼓虎變鳴綠揚旗長  
白飛箭徂定三韓俾漁俾佃

太宗嗣服賡武維文始命六籍贊我六軍赫赫

世祖智勇天錫函關并聚燕山霆擊蠡爾青袍凶  
德不迪皇怒赫張援鄰剪敵狃狃狃飽我  
鋒鏑秦豫獻圖荆吳奉檄粵蜀滇黔分官班  
曆干戈旣橐圖史聿親五海服義九域依仁  
仰迪舊典俯命儒臣曆載十八革薄還淳  
帝命我

后纘壹函夏德覃禽魚賞及牛馬九達一軌于市  
一賈五鳩撫時四靈毓野宣節八風笙歌二  
雅爛爛卿雲菁菁甘露雷以滿盈雨而汜濩  
賜爵鮐齡錫租雁戶鉦戟殲征烽烟息戍黑

齒黃頭熙熙含哺大化浹矣至德商皇肅容  
措璧恭已垂裳穆懷曩辟嘉言克彰如金有  
莖似矩成方爰咨爰度裕我

帝光廼協良辰廼登嘉節懿典式陳

經筵攸設雞人裁唱虎賁乃列侍衛簪貂躬桓  
冕驚貴賤以臚尊卑以埒遂

憑金几肅進鴻儒維魯維邾若姚若虞疇龍是  
畫疇龜而圖乾坤曷位禮樂曷殊苞茲微義  
牖道斯腴翼翼臣工欽承懋德

后聖維堯臣謨慚益火紀雲師蟲編鳥跡皇帝王

霸與時因革猗歟素王垂編鑠策洋洋聖謨  
億祀罔斁縹帙斯傳道秘用繹敢告誓御庶  
幾倫脊

天子曰俞是訓是彝綠圖予友大撓予師臣拜稽  
首我

后萬壽宮府惟一遐邇惟宥無射斯保不顯云觀  
乾健無疆厥德日富

天子曰俞乃言維服甲冑予箴衣裳予幅臣拜稽  
首我

后萬年克弘康濟作乂蒼黔奕葉引考王路平平

子孫萬姓基德几筵如江自岷如月初弦

天子曰俞予惟克邁大武予勤近功予戒

皇帝睿聖百王莫侶六經孔昭百禮備舉秩秩

經筵萬邦譽處溟澥不波朔南靡阻臣慶嘉魚

民歌多忝自天祐之萬年承敘

橫雲山人集卷之二